


SI HIGANTE AT ANG MAHIWAGANG BEANSTALK

Sulat ni: IVAN ANAVE at REX FUNTILAR

Sining ni: CLYDE SAMSON | Dibuho ni: SJHEY CANONIGO



Payapa ang buhay ni Higante at ng kaniyang asawa sa Mariahangin. Dahil sa likas na yaman pinayayabong ang kanilang mga lupain sa kaharian ng Mariahangin, Bugsuk, at Pandanar, pinangangalagaan ng mga Molbog, Palaw'an, at iba pang naninirahan dito ang kanilang katutubong lupain.

Namumuhay si Higante sa pangangawil, pangangatihan, pangangaso, at pagkakaingin. Ika niya, mahalagang mapanatili at maprotektahan ang lupaing pinagyaman ng kanilang mga ninuno.

Gayunpaman, kabaliktaran ang paniniwala ng kaniyang asawa. Ayon sa kaniya, "Mahalagang mai-bahagi ang lupaing ito."

"Ho-ho-ho. Huwag kang magpalamon sa mga sakim at 'makabagong' kaisipan ng mga dayuhan," palaging sagot ni Higante dito.

Isang araw, habang tinatapos ang tungkulin sa kapatagan, napansin ni Higante ang pagtubo ng ka-kaibang halaman sa isang bahagi ng kanilang lupain na hawig sa isang beanstalk.

"Ho-ho-ho. Hindi ako ang nagtanim nito! Saan galing ito?!" sigaw ni Higante.

"Walang panganib sa mga beanstalk na ito, Higante. Baka ito ay biyaya!" paliwanag ng asawa. Nagawang kalimutan na lang ito ni Higante at natulog na lamang.

Sa kaniyang paggising, biglang naglumihanan si Higante dahil sa mga nawawalang likas na yaman at mga kasama sa kaharian.

"Ho-ho-ho. Nasaan ang ating yaman? Nasaan ang ating mga kaibigan?" tanong ni Higante.



Sa kaniyang paggising, nagulantang si Higante sa mga bakod na nakapalibot sa kanilang lupain.

"Walang panganib, Higante. Ligtas ang ating mga kasamahan. Pinalipat lamang sila ng ating mga kaibigan si Ramon Ang, kasama ang ating yaman," sagot ng kaniyang asawa. Bagama't hindi mapakali sa mga nangyayari, pinilit na lamang kumalma ni Higante; nagtrabaho, at muling natulog.

"Ho-ho-ho. Bakit may mga bakod na dito?" tanong ni Higante.

"Walang panganib na dala ang mga bakod, Higante. Makukuha naman natin ang titulo para sa mga lupaing ito at hindi naman nga angkop para sa pagsasaka ang mga ito," sagot ng asawa. Muli, walang nagawa si Higante kaya't nagtrabaho at natulog na lamang.

Sa ikatlong pagkakataon, nagising muli si Higante dahil sa ulyaw ng palakol na tumatama sa punongkahoy. Nagulantang siya nang makita ang mga estranghero sa lupain, ang naglalakihang mga beanstalk, at malapad na karatula kung saan nakapinta ang mga katagang "Bugsuk Island Eco-Tourism Development Project."

Nakita niya ang sagwil na hawak-hawak ang palakol at agad na nakilala ito-si Juan San Miguel. Ikinasadlak ni Higante ang kasakiman ni Juan kaya sinubukan niyang komprontahin ito.

"Magnanakaw!" sigaw ni Higante habang tinatakasan ng magnanakaw. Hinabol ito ni Higante habang hangad ang katarungan.

"Habulin mo ako!" mapanuyang sambit ni Juan. "Hangga't mayroong magic beans, akin ang huling halakhak!"

Nabagabag si Higante sa sinabi ng magnanakaw. Bumalik sa kaniya ang lahat ng kamalasang naranasan sa mga nagdaang araw: ang pagtubo ng beanstalk, ang paglaho ng mga likas na yaman, at pagbakod sa mga lupain. Malalim na ba ang pagkakatanim ng binihi ng kasakiman?

"Anong uri ng kasamaan pa ba ang dala ng magic beans na 'yan?"



"Hindi kasamaan... karangyaan!" palalong sagot ni San Miguel. "Sa wakas at nagkatotoo ang ipinan-gako ni Senyor Marcos!"

"Ipinagkaloob niya ang magic beans na ito dahil karapat-dapat ako. Ang langit na ito ay hindi sa iyo at mas mainam ang hangarin ko. Akin ang langit na ito!" dagdag ng magnanakaw.

"Kayong lahat ay sakim! Ang kalikasan ay hindi ari-ariang pinagkakakitaan. Kayo ay nasilaw ng kayamanan, mga walang pakundangan! Sa amin ang Bugsuk, hindi sa San Miguel!" bulalas ni Higante.

Nagpatuloy ang kanilang habulan hanggang makarating sa pinagtubuan ng beanstalk.

Mabilis ang kamay ni San Miguel, pati ang kaniyang mga binti. Dali-dali itong bumaba sa lupang mababaw.

Sa pagnanasang marinig ang mga hinaing, bumaba rin si Higante sa beanstalk. Subalit, nakaramdam siya ng pagyanig.

Unti-unti umuga ang tangkay dahil sa pagputol ni Juan San Miguel. Gamit ang palakol, binuwal ng magnanakaw ang beanstalk. Natumba ito at nagdulot ng kamatayan ni Higante.

Matagumpay na naibulsa ng tusong San Miguel ang kayamanang ninanais. Nagbunga ang kaniyang pag-aakyat-bahay at pang-aabuso sa mga katutubong naninirahan sa lupaing pagtatayuan ng proyektong kaniyang pagkakakitaan.

Bagaman naputol ang tangkay ng sumpang beanstalk, nananatiling malakas ang kapit ng mga ugat nito. Hindi malayo ang hinaharap kung saan ang sumpang beanstalk ay lalagong muli upang pahintulutan ang kasamaan ni Juan.

Ngunit, hindi pa tapos ang pakikibaka.

